

廣  
西  
名  
勝  
志

廣西名勝志卷之四

閩中曹學佺能始撰

梧州府

在省城東  
前七百里

領州一縣十

漢地里志蒼梧越地秦始皇貶百越以屬桂林郡  
秦末趙佗自立爲南越王封其同姓趙光爲蒼梧  
王卽此漢平呂嘉以其地爲蒼梧郡之廣信縣因  
於郡燕置交州元封五年置十三州刺史於禹貢  
九州之外交州刺史部七郡蒼梧其一而交州仍  
治廣信後漢獻帝末孫權以步騭爲交州刺史始  
遷州於番禺孫皓時分置廣州理番禺而交州乃

龍編美晉宋齊梁陳蒼梧爲郡不改至隋始廢  
唐平蕭銑置梧州天寶元年改蒼梧郡乾元元年  
後爲梧州宋因之元改梧州路 我明設府○史

記帝舜南巡崩于蒼梧之野山海經曰蒼梧之山  
帝舜葬于其陽丹朱葬于其陰文穎注漢書以爲  
九疑之山半在零陵半在蒼梧也魏澹引玄中記  
云堯時有何侯者隱蒼梧山至夏禹已二百餘歲  
五帝賜之藥一器家人三百餘口同昇今爲太極  
真人按此則蒼梧已著名于上古者矣○羅弘蒨  
州長沙人漢元封五年初置交趾部刺史弘入蒼

梧春行冬息徧歷所部咨詢疾苦太守而下多解  
綬請罪弘庶實舉發一時貪殘爲之斂迹部內肅  
然○喻猛和帝時爲蒼梧太守以清白率吏郡人  
頌曰於維蒼梧交趾之域大漢惟宗達以仁德○  
賈琮字孟堅東郡聊城人靈帝授交州刺史時交  
趾屯兵反執刺史及合浦太守琮到部訊其反狀  
咸言賦稅過重百姓家殫民不聊生故聚爲盜賊  
琮卽移書告示各使安其資業誅斬渠帥爲大害  
者簡選良吏試守諸縣蠲復徭役百姓底定巷路  
歌曰賈父來晚使我先反今見清平吏不敢飯○

陸臨字子然南海人漢末建中爲蒼梧太守推誠  
而理漢人以孝悌民有遺腹子爲父報怨殺人被  
吏所獲臨知其無嗣令其妻侍獄後產一男郡人  
歌曰蒼梧府若恩廣大能令死囚有後代建安中  
徵爲廷尉後本郡以五月五日祠臨東城門上令  
小童繫戲以舞之○圖經云朱臨水在郡城南後  
漢郡守陳穉升郡事暇時釣魚于此○朝臺岡在  
城北六朝范曄築臺山上遇正朔輒率群僚望朝  
而拜○梧州有總府其右爲總督制府而總兵府  
在總府之東北謂之西府故事元戎乃勳侯也嶠

南瑣記云舊府中有伏波將軍所鑄銅鼓其一尚存形不似今制深三尺許面徑可三尺五寸旁圍漸縮如腰形復微展而稍弇其口似今之竹煢籥體絕薄純綠色紋甚精古面環遶作鼉龜十數昂首如欲跳狀中受擊處亦平但畧厚如鏡耳已有斷裂痕擊之聲不甚發聞一完好者近爲稅璫獻之內庭所懸木架尚存堂之左右有銅鑄狼機數柄倒於地製亦精必非近時物也又聞蒼梧郡有銅船沈于水至今天霽水澄隱隱可見謂是伏波所鑄按後漢書永和間周敞爲交州刺史採龍山

唐書卷之四  
三  
之木爲州門鼓仍分一鼓給桂林郡一鼓給交趾  
郡擊一鼓則二鼓皆鳴所謂叩宮而商應者也其  
形亦倣銅鼓之製大抵夷人重約誓信鬼神故多  
作此類以鎮服之耳○儒林傳後漢劉熙字成國  
北海人博覽多識名重州黨建安中薦辟不就避  
地交州往來蒼梧容授生徒數百人乃卽物名以  
釋義惟揆事原致意精微作釋名二十七篇熙自  
爲序其時有程秉字德樞南頓人少明周易詩書  
逮事鄭玄得其奧秘後避亂交州與熙考論大義  
遂博通五經士燮命爲長史孫權聞之以禮徵辟

拜太子太傅後卒于官所著周易論尚書駿論語  
彌凡三萬餘言又有薛綜字敬文沛郡竹邑人世  
典刑郡爲著姓綜少明經善屬文舉秀才漢末大  
顯乃依故人選地交州從劉熙學士燮旣附孫權  
召綜爲五官中郎除合浦太守治郡威惠並行民  
僚愛之轉守交趾時交土始開刺史呂岱率師討  
佞綜與俱行事畢還都守謁者僕射赤烏三年徙  
左部督尋爲選曹尚書太子太傅六年春卒所著  
詩文名曰私載○西事珥云後漢末平間陳元長  
孫以布衣伏闕疏稱范升等所駁左氏義皆斷截

小文蝶黷微辭抉瑕摘譽掩其弘美請復立左氏

學上從之元獻難將軍欽之不欽治左氏與劉歆

同時而各自為家三輔決錄謂左氏春秋遠在蒼

箱蓋指欽也元子堅卿亦以左氏顯若此則遐陬

系上能引經術崛起固不必借光于富賢矣○牟

子者蒼梧人其自叙曰靈帝崩天下擾亂獨交州

左安北方異人咸來茲土多為神仙辟穀長生之

術時人多有學者牟子常以五經難之道家術士

莫敢對是時牟子將母避世交趾年二十六歸蒼

梧娶妻太守聞其守學請請署吏牟子見世亂無

仕宦意竟不就州牧辟之復稱疾不起牧弟豫章  
太守爲中郎將卒融所殺牧乃請牟子曰弟爲逆  
賊所害骨肉之痛憤發肝心當遣劉都尉行恐外  
界疑難行人不通君文武兼備有專對才今欲相  
屈之零陵桂陽假塗于通路何如牟子曰被絺服  
櫪見遇日久烈士忘身期必騁效遂嚴當發會其  
毋倖亡不果行久之歎曰老子絕聖棄智脩身保  
真萬物不干其志天下不易其樂故可貴也于是  
就志于佛道兼研老子五千文含玄妙爲酒漿翫  
五經爲琴簧遂乘筆墨餘閒畧引聖賢雅言證解

之名曰牟子理惑云

蒼梧縣附郭

漢蒼梧郡之廣信縣亦郡所理也隋始設蒼梧縣  
縣南十五里與封川界屬廣東有兩廣樹在封梧  
之間南北兩柯驗其榮瘁以卜兩省之豐凶○唐  
盧綸寄嶺外故人見說南來處蒼梧接桂林過秋  
天更煖邊海日長陰巴路緣雲出蠻鄉入洞深信  
迴人自說夢到月應沈碧水通春色青山寄遠心  
炎方難久客爲爾一霑襟明解纜詩蒼梧城北繫  
龍洲水接南天日夜流水井鱈池春草合火山鮫

室夜光浮千家竹屋臨沙嘴萬斛江船下石頭歌  
枕夢圓霄漢近珮聲猶在鳳凰樓○按志繫龍洲  
在城東七里大江中亦名七里洲江水巨漲洲獨  
不沒故謂之繫龍洲口水井在城東永井寺內其  
水澄湛不涸味甘且冷唐經畧使元結目之爲永  
井又爲銘刻石上其前有浣清堂今廢○鰐池一  
名思良江在城北二十里亦名多賢水其中鰐魚  
有四五是長者二丈恒在山間伺鹿亦能啖人攷搜  
雜記稱扶南王范尋養數虎於大雲山以罪人投  
之無罪者虎不食乃赦之又於池養鱷魚十數頭

按之如大雲法學士解公似用此事曰大雲山在  
城東北隅有伏虎巖蟠結危聳卽范養虎處今按  
虎之事寂然乃有三界廟者廟中小蛇十數背青  
腹赤日有火光常緣神身及蟠繞藤香上人以手  
按而玩之甚馴習往來莫知其嚮有所願越期未  
嘗者蚊輒至其家人驚曰神索願也友人鄭紱偕  
予至橋渡江祀之果然廟在火山之麓○寧字記  
云火山府城南隔江山水深無極山上有火每  
三五夜一見如野燒或言其下水中有寶珠光燭  
三上或言南越王尉陀藏神劍於此故騰焰如火

山有荔枝四月先熟吾閩稱火山荔枝本此又產

獸名靈麋生三足郡中有災福及使車將至則先

鳴唐沈佺期詩身經火山熱願入瘴江銷虞衡志

云嘉魚在火山下丙穴中狀如小鯽魚味極美春

末尤佳○三江以左右二江合府江匯于城南故

名府江一名桂江卽灘水也水經注曰鬱水又逕

蒼梧廣信縣灘水注之又東逕番禺入海是矣漢

武帝使馳義侯發夜郎兵下牂牁江會番禺卽此

也水傍有石英山宋產石英克貢英山之左有鶴

飛岡相傳南漢太守劉曜嘗鑿斷之俄有雙鶴飛

逝于上又城北六十里有通星山亦傳曜所鑿以  
觀星象者○金石山在城東二里圖經云吳時有  
道士牽牛渡江語舟人曰船內牛糞聊以相酌舟  
人視之牛糞皆金須臾道士與牛並隱石下○石  
鼓洞在城西北五里山巔有洞洞下爲慶林寺其  
左臨江爲高明亭故址○蘓山在城東南八里大  
江之滸相傳宋蘓軾被謫南行泊舟於此山下故  
名○立山在城西十五里東臨大江山坂平行西  
極險隘一徑通藤○印山在城西北三十里其形  
正方如印特立水塘中塘曰大印塘○城冢記云

農城縣在治西南晉置劉宋時廢郡國志云縣有  
銅山鑄湖銅丘○戎城縣亦晉置宋咸平省入以  
地置戎墟鎮○歌羅城在治西南六十里隋開皇  
李賢京以屯兵者○漢孝子丁密墓在縣內密遭  
父喪廬于墓側有雙鳧游密舍傍小池見人馴伏  
後遭毋喪復廬甚三年雙鳧游戲池中亦如之全  
時有頰琦者毋喪獨身造墳歷年乃成手種松樹  
成行感飛鳧白鳩之瑞南史范雲爲刺史遣使祭  
密及琦墓是也○唐吳武陵墓在城內桂芳橋有  
刻唐咸通二年立○朗吟亭在城東跨濠通放生

池舊名飛仙以昔有神仙朗吟其上○武寧渡在  
迤運所前桂江之側○戎墟渡在城南二十里大  
江上通長洲卽宋戎墟鎮○五兩渡在縣東二十  
里本唐詩惡說南風五兩輕之句

藤縣

在府西  
六十里

本漢蒼梧郡之猛陵縣地晉置永平郡於此隋廢  
郡置藤州唐天寶初改感義郡乾元初復爲藤州  
治寧風縣寧徙治鍾津縣元因之我 洪武十一  
年改州爲縣省鍾津入焉○唐宋之間發藤州詩  
朝夕苦遄征孤魂常自驚泛舟依古泊棹節聽猿

鳴石髮緣溪長林衣拂地輕雲峰刻不似苔壁畫  
難成露浥千花氣泉和萬籟聲琴幽紅處歇躋險  
綠中行戀結芝蘭砌悲纏松柏塋丹心江北死白  
髮嶺南生魑魅天邊國窮愁海外情勞歌意無限  
冷月爲誰明○東山在縣東一里上有李衛公祠  
以公南征嘗駐師於此○南山在縣南二里頂平  
如砥上有杏壇松崖竹巷芹澗皆清絕勝地附近  
爲石壁山巖巒相倚松檜倒生其下卽大江也又  
有石人山危石臨潭遠望如人○龍驤山在縣南  
七里數峯聳列下俯清流晉龍驤將軍陳隱鎮此

嘗駐兵山下故名○登嶼山在縣西十五里二山  
南北對峙江中蒼翠相望濫於眉睫○六爻山在  
縣西九十里山形交加如列成卦○赤水峽在縣  
東六十里峽南有巖深濶丈餘頂竅通日光相傳  
李白嘗過此因名李白巖峽與巖相對壁立而一  
水中流舊有廣惠寺今置巡司其上○白藤嶺在  
縣西南一百里路通容縣多產白藤今昔州縣俱  
以此名○藤江在縣北源出交趾至邕州左右江  
至此與繡江合又東流至番禺入海蘇子瞻詩繫  
舟藤城下弄月鐔江濱江月夜夜如雲山朝朝

按宋紹聖間黃門蘓轍責授化州別駕其兄軾亦徙儋州相遇於藤作詩倡和卽此處也○鐔江在縣東南自高州北流徑容縣至縣城東入於黔鬱唐武德初有宣撫使者至此艤舟遊慈聖寺以金杯挹井水杯墜井中汲水至乾不見杯只得一龜長一尺二寸宣撫解紅勒帛繫其腰放之井祝曰爾若有靈當漲杯出水及歸至寺門塘見龜踴躍塘內次日遊乾亨寺道忽見前杯自澗流出又見前龜紅帛仍繫於腰又拾龜而放之曰爾若有靈同歸供養是夜風浪忽起宣撫舟中有一寶劍浮

水而去明日集網窮搜不見但得古藤一根而埋之乃至西岸又見龜跡環繞及奏改移鷺州於此仍依龜跡築城名其地曰鐔津且於寶劍躍水處名劍江○注王泉在縣西南宋秦觀詩中有涵雲注王之句故名元余觀詩雲蒸崑山液月浸藍田英臨風嘯沆瀣滿腹珠璣鳴○桂山泉在縣東二里色白味甘余觀詩寒蟾窺玉甃老兔遺香酥化爲銀河水一沃炎海枯○鴨兒灘在縣南三里富禮詩云秋高霜降餘灘淺石齒齒漁郎吹笛來野鴨斜飛起山頭兩石人並坐如笑指○金環灘在

峽內唐武德初有於藤州得馴鵝者能言語歌舞  
獻之內庭歲餘不語恠而問之答曰身居南土生  
長禽中父母異方故不敢言上憐之賜以金環而  
遣之歸因以是名○榻州托州俱在縣東繡江上  
居民鱗錯○秦觀題藤州光善亭詩霞通海天曙  
月來東山白共是凭欄人誰足當秋色相傳觀在  
藤嘗夢中作辭云山露添花花動一山春色行到  
水溪深處有黃鸝千百飛雲當面化龍蛇夭矯樹  
晴碧醉卧古藤陰下杳不知南北時觀已病是日  
偶爲客述之因索水水至不能飲笑視之而卒

容縣

在府西二  
百四十里

本漢合浦縣地晉分立嚴昌縣梁改曰陰石縣因  
立陰石郡隋廢郡改縣曰奉化又改曰普寧屬藤  
州唐武德四年平蕭銑置銅州貞觀八年改容州  
以容江爲名宋元如之我朝改縣○唐曹唐送  
嚴大夫再領容州日照雙旌射火山笑迎賓從却  
南還風雲暗發鏡歌外號令潛生氣縈間簾竹水  
翻臺榭濕刺桐花落管絃閒無因得報真珠履親  
從新侯定八蠻○大曆間元結爲容管經畧使植  
蓮于廨後池構亭曰面面以其四周爽豁可矚蓮

花而名。相傳蓮塘內有銅鍋一口，每風雨夜與  
譙樓禁鐘相搏，鐘蓋唐貞元間物也。當事者屢欲  
徙之，他處皆不克達。若還之，祇用其力之半。○濯  
纓亭在城西三里，繡江上有石橫江，枕流上平如  
砥，可坐數人，石罅如紫玉，尊受水數斗。次山亦名  
之爲濯纓，其水色似滄浪，故以濯纓名。○城南江  
卽容江也。一名繡江，有駱駝橋跨之。唐貞觀二年  
建學于此。至元始遷江源，出北流，藍山經縣城南  
東，流入藤梧。○距城十里有讀書臺，巨石蟠江上  
如砥，昔漁人繫舟夜宿，其許聞石上朗誦書聲，故

名○北靈山在縣北二里其狀似龜亦名真武巖  
又八里爲陵雲山勢高入雲上產斑竹○西山嶺  
在縣西二十里嶺斜而長聯絡不斷迤北卽大容  
山○大容山在縣西北二十五里高五百丈周圍  
一千餘里鬱林高潯諸州分擬其麓○都嶠山在  
縣南二十里山有八峰曰兜子馬鞍八疊雲蓋香  
壚仙人中峰丹竈而八疊坵奇秀有南北兩洞道  
書第二十洞天南洞寬廣平坦中有浮屠大像北  
洞差狹爲星壇者八中峰絕頂有室曰中宮院宋  
隆興中有梁賢者與友人遊此見有閣宇三間傍

多梅林取一顆嚼之自是遂不粒食。蘇東坡贈鄧道士詩：「乞得紛紛擾擾身，結茅都嶠與仙鄰。卽此○楊山在縣西雲凌里，唐楊貴妃產於此，有井尚存。曰楊妃井，妃小名玉環，父亡，母葉氏懷孕十三月而生，妃後軍都督部署楊康以財帛求之爲女。三歲聽康親女讀書，卽能成誦。時有長史楊玄琰攝行帥聞之，遂倍金帛與康得之，選入壽王宮。明皇召入內，爲貴妃號曰太真。○龍母墳在縣南二百里，白花村沿澗而入，層崖濺瀑，飛下數十丈，瀑之左，群峰盤竦，稍夷處儼成一月堂，龍母墳在焉。

東偏有小石池容水數斗石壁如削下臨急湍不能容步衆流奔瀉百數十尺乃漚爲深潭渟泓莫測龍蓋蟄伏于此初徭人婦入山中久不返衆往覓之則爲龍所據陰雲罩幕旣歸所居常有寒氣人莫敢近婦不自覺也娠歲餘產一龍胞中無血止下水數斗頃之雲霧交集騰舉而去婦亦無恙後數歲婦以病死方殯忽有龍自空中下盤旋蜿蜒數四遂擁其骸以去衆隨之至其地石忽自裂龍竄骸陷而入焉石復合後龍常至其家飛繞屋前久之乃去○唐王翊字宏肱大曆中爲容管經

畧使初夷獠梁崇等煽亂據其城前後經畧使皆僞治梧翎曰我容州刺史安可容他所必得容乃止出私財募士有功者許署吏于是人人自奮不數月斬賊帥歐陽珪悉復容州故地詔徙治順州○戴叔倫貞元初爲容管經畧使綏徠夷落威名播聞德宗嘗賦中和節詩遣使者寵賜之其時有常丹爲容州刺史教民耕織禁止惰遊始城州十三里開置屯田二十四所○宋王次翁知容州賊不犯境嘗慕元結之爲人取結在道州時乞免科率二奏刻之石并其遺像以自觀省曰庶不墜

元子之政也○元封履孫字道坦至順間進士嘗  
任清水司巡簡致仕日寄情詩酒淹貫百家所著  
有容州人物記○國朝彭清錢塘人未樂進士知  
容縣事撰坎邑志三閱月而成在公之暇發爲詩  
數篇有風致

岑溪縣

在府西南一百九十里

本漢蒼梧郡猛陵縣地陳置永業郡於此隋罷郡  
置永業縣唐武德五年分置龍城縣仍置南義州  
貞觀五年徙治岑溪宋太宗時避御名改南儀州  
熙寧五年州廢以縣屬藤州 國朝改今屬○高

城山蟠結縣南勢競高遠土人以爲石人嶺有巨石如人立狀○烏峽山在縣北十里壁峻千仞縣治是憑舊有烏峽巡司今改上里河村去縣四十里○丁蘭山在縣東十里有丁蘭村爲漢孝子丁蘭故居或云孝子丁密非蘭也一名丁郎山其下有泉名孝感泉密字靖公詳蒼梧下○都盤山在縣南二十里一名羅山○冷水山佛子山並在縣西南三十里兩山相接如翼之張縣以爲輔○要義山在城東一百里崢嶸秀特又名秀峰卽繡江之源也縣南有皇華江縣西有潘洞江俱出連城

鄉經縣前西流入于繡江下藤峽入梧○孫吳虞  
翻字仲翔會稽餘姚人爲騎都尉數直諫吳主權  
不悅權與張昭論及神仙翻指昭曰彼皆死人而  
語神仙世豈有仙人也權積怒非一徙翻交州後  
徙蒼梧猛陵嘗云自恨疏節骨體不媚犯上獲罪  
當長沒海閻生無可與語死以青蠅爲弔客使天  
下一人知己者足以不恨雖處罪放而講學不倦  
門徒常數百人在南十餘年卒○晉勾漏令葛洪  
在縣東六里山脩煉有棋盤石澗流涓涓入石竅  
中因名葛仙巖相去里許有石穴出泉其冽名葛

井昔題巖壁上詩云古洞門深百尺寬石巖題詠  
暗苔斑細尋仙令燒舟去滿地流泉浸月寒

懷集縣

在府東北一百五十里

漢四會縣地晉懷化縣隋改懷集西南有懷溪合  
馬寧花堦諸水經廣州入海其南峰有釣臺石臨  
溪水色澄泓時出白魚游泳可見按懷谿發源齊  
嶽山在縣西北一百里峭拔出於衆山之上望如  
嶽齊故名○天馬山在縣南五里唐地理志驃山  
疑卽此○四門巖在縣西五十里突起平地中有  
石室外有四門巖中石乳凝結爲柱者八爲蓮花

者一此巖之東北又有遊仙巖巖中化龍石一石  
入一西南有三潮巖巖中有泉應潮輒湧○朝巖  
在縣西八十里徑窄而暗其中明徹滴乳凝結爲  
珠玉纓絡鳥獸龍蛇之類甚多此巖西南又有燕  
巖石峰峭拔入洞深邃中有石僧芝菌其局以多  
蟄燕于此故名○梅子山在縣東一百里中多梅  
樹掩映成林○白崖山在縣西南百五十里山嶺  
險峻白石楚楚望之如雪故名○廢懷遠縣晉置  
在城東十里今立古縣營是也○廢威州唐置領  
懷集永固潯水三縣尋廢今縣西南獨過里大路

傍有龍崗驪是其遺址○廢永固縣舊志云在城北不詳其處今縣東南務本里有永固岡城垣基址猶存疑或近之○廢洺水縣在縣西西水里斤水渡頭上里許蓋永固在唐開元時省入懷集而洺水以宋平南漢時省也○古龍涸在黨山大凹潭深不可測相傳有龍潛其中每風雨時作潭自有聲歲旱祈禱輒應○上愛嶺與新州四會縣接壤唐神龍間五祖傳衣鉢與惠能密囑能速去恐人害之嘗潛至上愛嶺最高峯頭石室棲遲至今猶傳曰六祖巖長慶年間洺水縣建寺以尊崇之

後寺廢乃于道士巖前重建○道士巖卽花石洞也晉葛洪字稚川號抱朴子嘗遍遊名山過涪水縣覽花石洞遂居之采覓丹砂及金鵝蕊諸藥卅竈中鐫抱朴二字水清墨蹟隱隱尚存後人遂以道士名巖○明廣文黃宣遊花石巖賦辭采驕麗余乘之云於爍懷陽秀石峙嶒盤錯蒼梧枕轉交粵挺玄黃之厖象跨嶺海而橫越乘標引峯連絲喝嶂體爽磴以屹嶒紛郁郁以纒列或靠鬼兮而崖峩或嚙峭兮而嶰嶰或藉峩兮參差或嶒嶒兮嶮峭而斷絕或下平行而曠蕩或上

而截薛于東則青江浮瀟蕩其隴于南則赤水激  
溪涌其穴其巖則有四門洞囑從橫竒嶇鬼嚙怪  
啐儼若天闕芝房無以參閏風不能劣于前則有  
冲天石竇上泊玄幽炫燿虹蜺于斗射牛雲鳥穿  
飛曾莫知其攀遊於旁則有坂坻嶺岈而成巘狀  
若藻蓮猗猗太華競秀爭妍游女弄竒于若邪之  
曲耕父揚光于清泠之淵於右則有北面齊嶽雙  
峰峻崕隆崇歸峴豐冠山之朱堂盤紆玲瓏儼員  
嶠之瑤室爾乃開白雲之庄披素書之帙簾簾雲  
幌霏霏映日圓地生明曲若新月邈乎哉洵宜望

之無際恬矣哉蓋流盼而靡一至若青冥迴薄魏  
魏銀表道人兮羽化雲女兮嬌媚金鵝石魚兮時  
不散龍鼎玄珠兮沈不曉淒乎雲淹兮神何竒溢  
乎水滸兮澤奚小爾乃登巉嶢覽遐逖披曉曠眺  
諸石則有夾若奔驟類天馬之騰空蜿若游龍儼  
巨鰲之直撐或前橫若削而筆聳或後赴若敵而  
劍擲或蒼蒼若雲門而飄颻或覆若洪鐘而仆仄或  
連若累空而輻輳或散若踣踞而遠埴美哉茂麗  
臨望廣矣竒矣衆備難覩記矣于是乃列寺營址  
棲樓于後東西膠葛南北駢複雕栞鏤采異出竒

構於此是乃崇基表剏金彩玉璞施不捨之壇結靈  
緣之閣掩室摩竭演勿照之真明柱日魄邪逼息  
言之妙覺夫然後九衢之草千芳四照之花萬灼  
崖谷共清地景交連于是同屢并井都人女士袿  
服觀粧雜沓雲纒躡臯巒以馳驚蕩神情之曠美  
恨百年之迅度日豐容之難似追穹輿之無盡識  
蜉蝣之幾遇于是有朱輪鼎貴僨從奕奕陳詩采  
風靈觴舉白澹忘懷乎紛務暢游倪于瞬息於是  
有玄真之子輕妙之容攀雲魏之石室尋霞舉之  
仙舄仰慈翠以延脰恣遨遊以高適此則花石洞

之搜傑世得爲雄羨者也若夫悟暉韶而葉綺感  
賦節而花燃雜好鳥之流聲釋機情于魚筌翫盈  
虛於物化揆與義於瓊篇綠草萋而送春朱櫻荐  
而迎愛愛晨風之弄旭厭夜黃之噪夜閑踟躕于  
月觀喜滂蕩于風榭搜沈寥以魂搖托沈騷而賦  
駕人安得前不懷余安能以自默乎客曰若吾子  
之言大都能道其要妙所謂殫究于前開發蒙于  
未覺矣蓋爲竟其說焉遂辭曰遠廓萬有天地宅  
兮崩芳茲石恢竒怪兮鴻荒無傳誰斧鑿兮巖巖  
具瞻洵俯仰兮苞光靈曜施莫石兮必有偉人哉

相符兮斐調知謬美贊侑兮○又有李滄者亦處  
文其詠南谿古渡詩云兩堤楊柳酒帘風去去來  
來信莫窮記得南河歸路晚水邊停騎落霞紅又  
佛燈晚照詩依約禪關入定鐘佛前燈火隔踈松  
山僧深夜渾無寐更借寒光照鉢龍

鬱林州

在府西北三百三十里

領縣四

本秦桂林郡地漢元鼎六年更桂林爲鬱林後漢  
光武二年世祖鬱林太守外卽此魏晉因之梁改  
爲南定州隋大業初改尹州煬帝改鬱州尋改爲  
鬱林郡自唐已來州郡率無定稱而鬱之名不改

州故治南流縣 國朝以南流省入○谷永漢建

寧中太守廣鬱古西甌駱所居永以恩信招降烏

濬人十餘萬開立七縣○吳陸績爲鬱林守歸舟

輕於岸上取巨石壓之人稱曰陸公鬱林石在今

吳郡之婁門陸龜蒙居臨頓里其門有巨石卽此

○毛靈晉泰始七年守鬱林壯勇慨慷爲吳將陶

璜所執不屈而死後人立祠祀之○劉宋太守劉

勳至郡珊瑚連理生勳聞于朝爲大明七年正月

○王安中字履道中山人宋靖康初以尚書左丞

論時政謫鬱林子孫因家焉○元文升宋末丞

論時政謫鬱林子孫因家焉○元文升宋末丞

天祥弟璧之子也信國死難以升爲嗣後仕元海  
北燕訪使卒葬于此州之八疊岡子孫遂家於鬱  
今有文丞相祠其裔諸生文運熙者尚藏 國初  
解學士縉書公上巳詩以貽燕訪子良錫云○圖  
經信石山在州東南二里一名牢石坡坡上夾石  
便豎如鐘唐置牢州以此每歲秋期鄉人共候此  
石若有雲氣覆之歲必大稔○石柱坡在州南三  
里柱高二尺相傳馬伏波立及七里爲兩道嶺峰  
嶺稠疊博陸二縣經由此分○寒山在州北二十  
里九域志云越王陀遣人入山採橘十日方回問

其故云山中大寒不得歸故名○荔枝山在州東南二十里山出荔枝夏月熟時如錦屏障○隱仙巖在州西二十里石室幽邃壁上題元和十四年來遊七字附近爲黃都山九域志云昔有樵夫入山迷路見黃衣冠者五人語之曰吾都此山者也故名○水月巖在州東南二十里洞中虛明石乳凝結如琅玕倒垂澗水從巖中流蕩漾激石遵澗行爲陰洞遊必列炬跨木渡澗數十步水石益奇削爲芙蓉伸爲仙掌湍盤柱立翔飛疾馳無所不有及出洞西內行板緣而上有一峯拔起草木

蔚洞在其腹是日天馬洞洞中有馬蹄跡莫紀其數直入石二三寸許又有鈞天洞分上下二界卽天馬西峯也下洞涉潭水始至臨潭有二石加之作金玉聲上界軒豁可布十筵坐聽考鐘擊石琅琅如鈞天之奏已拂日光矣溯其初入洞兩山欲合未合之間上露一道天光晻晻如昧爽初曙澗流紆折與之相應又別自一世界也○南流江在州之左南流縣以此名源出大容山會綠鵝水西南流十餘里八疊縈迴過羅望江至廉入海江濱有巨石如伏犀石間二竇水各湧出合爲一派迴

數十步入江宋嘉定十六年忽湧紫水因名紫泉  
○五龍潭在州南三里其水甚深色如靛旁有石  
壁狀如雕鏤○司命井在鬱平廢縣縣即唐麟德  
初所析置也南越記云縣有石井其淡半之可給  
闔境不竭又其南有石室皎紫明明中有石人像  
中一石床可坐百餘人○郡國志云馬援造銅船  
一旣歸付程安令沈於渚天晴水澄往往望見船  
樓上恒似有四寸水不知幾十丈許○顧微廣州  
記云鬱林郡東南山上有池池有石牛百姓祈雨  
殺生牛以牛血和泥泥石牛背祭畢即大雨洗石

牛背泥盡乃晴又有西甌池在郡西越王遣甌脫  
淬劍于此晨夕常有煙氣今西甌驛沿其名○南  
史齊武帝乘龍舟遊江中緝越布爲帆結綠絲爲  
帆縹以鍤石爲足榜人皆着鬱林布作淡黃袴舞  
佻客樂按今鬱林葛南方稱爲佳物機誕而縱長  
五六丈然質頗重厚似不甚宜暑原貢額不載萬  
曆十五年始令貢千疋已又令貢二千疋工部覆  
奏定每歲百疋頃內監教之織爲龍鳳紋以獻  
今上登極敕止之○金石畧云後漢鬱林養奮碑  
字叔高和帝時舉方正碑以初平四年八月立○

唐鬱林觀東巖壁上崔逸八分書併撰文開元七年正月立

博白縣

在州西南七十里

本漢合浦縣地唐武德四年析置南州并置博白縣六年改南州曰白州仍以縣隸焉宋開寶五年廢白州以博昌縣隸蕪州七年復置白州紹興六年廢州爲博白縣隸鬱林至今因之○衛公山在縣東十里有靈應侯壇相傳卽李藥師也其側爲洞房山高廣玲瓏綴乳丹碧麗若雕房宋劉子羽謫居時置有尋山堂今廢○雙角山在縣西十五

里雙峯角立綠珠江發源于此又十五里爲綠羅  
山其下有綠珠村○將軍洞在縣南三十里洞九  
三重石室虛明中有石田石龍石廩有溫涼泉分  
爲二派而流石壁上刻南州太守領將軍龐孝泰  
十字○伏割山在縣西四十里鸚鵡孔雀諸禽多  
出其中下爲伏割村○金魚山在縣西南五十里  
舊傳魯產一角羊于此山下有石井深十餘丈多  
金魚○又十里爲宴石山北岸臨江中有二石流  
泉噴激崖宇虛曠峙于其巔寔宇記以爲南越王  
宴坐處○飲馬江在縣南一里漢馬伏波南征飲

馬十此○綠珠江在縣南七里嶺表錄異云白州界有一派水出自雙角山合容州江是謂綠珠江昔梁氏之女有容貌石季倫爲交趾採訪使以真珠二斛買之梁氏之居舊井存焉飲者必誕美女宋徐靈緣珠渡詩早出綠羅村晚過綠珠渡日落白州城草芳梁女墓江水流古今滔滔不相顧今人不見古時人依舊青山路如故○南漢時博白有遠村號綠合者皆高山大樹人跡少至斗米僅值一二錢以深窅險峻不得出也村民嘗自謂其山多鳳大如鵝五色有冠而尾甚長率居大樹之

巔睛明則雙飛而出所過諸鳥斂翼俛首伏不敢  
鳴者久之又宋景德間白州有三鳳自南來飛入  
城中群鳥隨之至萬壽寺前棲於百尺木龍樹上  
身長九尺高五尺備五彩冠似金杯此二則見西  
事珥○唐龐孝恭少以忠義自許龍朔中由武功  
歷左驍衛將軍遼東道行軍總管戰歿于陣○李  
時亮字端夫宋嘉祐中進士累官散騎常侍兼御  
史大夫亮善屬文尤長于詩與同官陶弼相賡和  
有詩曰李陶集已上俱博白人○蔡條叢記云博  
州城西有新村吾叟杖其間至一舍旁見兩老人

牽飲迺兄弟也大者年九十四顧謂曰此吾幼弟  
年七十八矣從旁環拱而立者皆老人之曾孫殆  
可入畫圖也

北流縣

在州東四十五里

本漢合浦縣地晉析置勾漏縣唐武德初改置北  
流屬合浦郡舊唐志云州所治也隋大業初以陸  
川縣地入焉唐武德四年析置豪石宕昌南流陵  
城新安五縣貞觀十一年省新安後又併豪石宕  
昌俱省元和郡縣志云北流縣在州郭開元中移  
於今理○縣學唐貞觀三年建在登龍橋西元大

德二年遷于寶圭驛至正間始遷今所○金龜山  
在縣東二里口叻尻足皆具遠近視之無不駭爲  
直者與會靈臺隔江相對亦高山也上有瀑布巖  
洞○梧臺山在縣南天門山在縣西與穿鎮公界  
諸巖爲縣西南之鎮○勾漏山在縣東北十五里  
平川中石峰千百矗立特起其巖穴多勾曲穿漏  
故名山有靈寶觀觀東有龍潭洞冷襲毛骨觀後  
二小洞南向者曰太陽北向者曰太陰由觀後西  
北行卽勾漏洞洞前俯瞰有橫塘石室室東爲寶  
圭洞秉燭而入丹竈床几盤甕礮臼皆石乳自然

疑結而成約半里許水涯循梯直下拏竹筏而行  
歷甕門三四重間闌委曲窮水際益廣益竒矯首  
見一點煙如長虹出天表蓋石罅之容光也捨筏  
躡梯板躍而上其中一室曰蟠桃深三四百步仰  
視高處杳不見頂其西小室明朗連榻周遍可踞  
可卧是爲道書第二十二洞天按北流志云晉葛  
洪爲勾漏令嘗於寶圭洞脩煉成仙雒州志云洪  
句容人聞交趾出丹砂遂遊雒訪羅山寺脩煉丹  
成復遊勾漏歷羅浮以去廣州志云洪將之勾漏  
至廣州刺史鄧嶽留之不聽去止於羅浮煉丹忽

與鶴疏云當遠行尋師嶽急往別及至洪已兀然  
而逝燕子瞻與王定國書云葛稚川求爲勾漏令  
而竟化於麻州其說不一如此晉中興書云洪亡  
時舉屍入棺輕如空衣豈其屍解於羅浮而後游  
於勾漏耶山西事珥云勾漏洞天四面石山圍繞  
其中忽開平野數里洞在地上不煩登陟外微敞  
豁中有暗溪穿貫而入與北流水合結小桴坐其  
上命篙師撐之詰曲而行水無底兩岸石如虎豹  
怪巖森然欲搏行約里許仰見一大星爛然細視  
乃石孔透天光也洞對高崖上夏時望見荷葉田

巉然峻絕不可到土人云或見荷花則歲大稔口  
寶圭洞卽勾漏正洞石室中有玉宸道君及葛真人  
石像五季時迎自南海者遊人躡梯攀蘿曲磴  
飛棧如瑤階玉埒小石細碎羅列如杯如筭又如  
楊梅荔枝充滿梁疊莫可名狀轉仄僅容跬步直  
穿太陰洞後出山腹乃寶圭之東洞中室曰蟠桃  
廣三四百步仰視高處不見其頂西小室洞朗外  
矚自然石榻平鋪疊架可眠可踞與東洞對正如  
兩掖○白砂洞縱廣一項高數十仞石膏玉英散  
彩流光下有涸井數處皆舊時採砂之坎凡砂生

於此其色獨白故名洞西有韜道觀石碣記云南  
漢時中官陳君所經營左右二石室深四五尋石  
床相對隆冬亦溫其上重重如層樓榭閣與溪澗  
映帶有石窟高深者丈餘韜真觀傍有玉虛洞洞  
中物象瑩潔如玉雲從洞出則雨風從洞出則霽  
玉虛洞之下有巫山寨規圓二頃絕壁千仞十有  
二峯四顧一圍間以尖峰懸崖噴吼韜真觀之西  
巫山寨之北有玉田洞洞闢三門其盤石皆翠碧  
色平夷通明可以似仰其膏乳悉具物象綠石棧  
行百步傾身而入乃至石田數丘石花如玉田中

積水無間冬夏不溢不涸出洞而南半里至玉田  
寨高十餘仞其深莫測北流爲一池中有小島水  
潛通江時有大魚逆流而入去船直菴五里有普  
照巖山如覆釜洞穴當其胸入洞仰視不可階升  
而其中仙壇寶塔迭昂交錯幢幡羽衣獵獵飛動  
巖間有獨少巖孤峙平野之中石室廣六丈高倍  
之虛曠平夷可容數千人石乳樹壁上儼如西方  
佛像○綠藍水出綠藍山其流有二一經廉州入  
海一經容縣至番禺入海有橋曰落桑跨綠藍江  
去縣東二十里○銅鼓潭在縣北二十里昔有銅

鼓浮水而出擊之聲驚於波濤至暮復流水中 本

朝景泰三年其鼓後出舟人獲送本縣譙樓至今

存○馬門灘在縣西四十里漢馬援南征以江

流迅急築去其石餘二巨石雙立爲門其中流水

如奔馬故名○北戍灘在馬門灘下唐高駢爲安

南都護平蠻北歸患其湍險屬防遏使楊陵疏濬

之○鬼門關在縣西十里兩山相對間濶三十步

馬援討林邑蠻路由於此立碑石龜尚存往來交

趾皆由此關其南尤多瘴癘去者少得生還諺曰

鬼門關十人去九不還我 洪武初敕改爲桂門

唐宣德中改天關唐沈佺期詩昔傳瘴江路今到  
鬼門關土地無人老流離幾客還○明解縉上北  
流二絕句 賓家寨前朝雨晴思羅港內水初生楊  
梅菓熟春欲暮豆蔻花開鳩亂鳴 又 金鷄驛前津  
吏迎金鷄巖下江水聲金鷄飛上九天去惟有空  
巖餘舊名

陸川縣

在州西南  
七十里

本漢合浦郡地隋置陸川縣大業初廢入北流縣  
唐武德四年復置宋會要云開寶七年廢順州省  
龍臺溫水龍化南河四縣入焉九年移治公平淳

化五年復徙治溫水元屬容州 國初洪武四年

改今屬○後陽山爲縣所據群峰疊嶂起伏不齊

○東山去縣八里高二十丈中有泉水南入紗洞

其下爲金沙溪○文龍山在縣東北十五里山下

有水流遶縣前○雙龍山在縣西南二十里山高

百仞雙瀑流注即古龍豪縣治也○鳴石山窳宇

記云董奉旣死人見於鳴石山山海經云長石之

山洪水出焉山多鳴石即此○石袍山方輿記云

山多竹水葱翠如袍山有肉翅虎下山食人食訖

即飛還絕巖○白羊山出色潔白四面懸絕上有

飛泉下有勾芒木可爲布○交黎山在縣南產黃  
白藤及多鷓雉蚶鹿有水濼洄比九十九渡○六  
穿石在縣北壁立如碑高丈餘上穿六孔○簫韶  
山九域志云嘗聞音樂於此○崑崙水在縣東水  
中有石似崑崙下流經廉州入海○平南水在縣  
南二十五里合龍化江流入伏波灘

興業縣

在州北  
六十里

舊唐志云石南縣州所治也梁置定州陳天嘉中  
置石南郡於此隋開皇十年改郡爲石南縣唐麟  
德二年析石南置興業其後因之○萬石山在縣

西四里峯巒錯落如累石然其下有石井流澗詰  
曲土人修禊於此○東斗北斗二山俱在城外十  
里東斗之外又有東山山上有泉從石飛下百餘  
仞望之如翔鸞舞鶴舊建有飛泉亭今廢○緱陰  
山在縣南十里有木如榕大蔽數十畝一名饒山  
鳴水江遶其下○翻車嶺在縣北二十里龍毋江  
之源也險峻難行車轍易倒故名○鐵城山在縣  
南十五里周圍巖嶺皆鐵色其中平衍容數百家  
外縹石壁險固如城上多石竇泉流不竭山有四  
門惟東首可通人行南門有土基相傳爲古敵樓

西北二門多石艱阻圖經云石南郡縣舊設於此  
永至道二年移治南流山北一里有古州巖廣數  
丈巖中有潭四時不涸又東入一竇有石懸下如  
鐘扣之鏗然石壁間有元和十四年來遊等字○  
白馬巖在縣西十餘里遠望如馬其中深廣可容  
數千人又有三四小洞幽深莫測上透天光○牛  
龍巖在縣南二十里中可容千牛每冬寒則居民  
驅牛入巖以避又有龍蟄於此○元至正間興業  
大李村有姓李者素好脩煉一日與妻自外家酣  
飲回至途中忽謂妻曰我體癯甚須過前溪一浴

汝姑待之少頃風雨驟作妻趨前視之則遍體鱗  
出矣爨妻曰我歲一來歸當以米糕視我語畢歛  
然變爲龍騰空去後果歲一還其里里人禱之雨  
澤霑足禾稼豐稔人呼其宅曰李龍宅